

Il Premi Nadâl Furlan - sabide ai 7 di Dicembar a S. Stiefin di Buie - al ricognòs il merit di cui che al fâs onôr ae identitât furlane tal mont.

» DI CHRISTIAN ROMANINI

**C**ussience de proprie culture tant che element di fuarce e no limit. Cun chest spirt, sabide ai 7 di Dicembar aes 5 dopomisdì li dal Teatri de Cjase de Zoventût a S. Stiefin di Buie, e sarà celebrađe la edizion n. 35 dal Premi Nadâl Furlan, istituđt dal Circolo Culturale Laurenziano e presentât di Monica Bertarelli, cu la partecipazion dal Coro di vôs blançjis dal I.C. di Tavagnà Le semicrome.

**Gloria Aita**, presidente dal Premi, nus da cualchi anticipazion.

Tropis candidaturis sono rivadis par cheste edizion?

"O vin ricevût 15 nons e ducj a vares-sin mertât. O vin sielt chei che, in cjamps diferents, a àn dât un contribût professional no dome a nível locál e che a son rivâts a risultâts significatîfs tal mont de culture, des arts, de promozion umane e sociâl e de tutele de furlanetât, te otiche dal messađ cristian".

Cui sono i vincidôrs?

"Alan Brusini al è un dai de-



Gloria Aita

ans de leterature furlane, cuntune produzion leterarie e poetiche impuantante. **Giovanni Frau** al è un dai plui granci protagonisti de vite academiche dal Friûl e linguist di nomee internazional. **Attilio Maseri**, cardiolic, al è congnossût a nível mondial no dome pes sôs cualitâts di ricercjadôr, ma ancje par jessi stât il miedi

# Braure sot dal arbul

di 3 presidents de republike, di papa Wojtyla e de regjine Elisebete e pal so mecenatisim, vint ancje lassât ae Universitat dal Friûl la biblioteche Florio-Maseri. **Giovanni Zanetti**, docent e diretor dal Conservatori Tomadini al à une lungje cariere di composidôr di musiche sacre e profane, diretor di coros e di concierits".

Il Premi ce messađ vuelial trasmetti al zovins?

"I premiâts a son personis che a àn lavorât cun determinazion, intelligence, sens dal dovê, desideri di contribuđ a miorâ la societât, tignint salt il valôr des lidris".

Ce pensie de identitât?

"E je un valôr zontât, no un limit. Jessi furlans dentri e citadins dal mont no son in contradizion. Chescj principis a àn di jessi trasmettuts ancje tes scuelis e par esperience o ai viodût che se i docents a fasin formazion cun relatôrs qualificâts, si passionin e a rivin a passâ cheste passion ancje ai students. Fevelâ par furlan nol limite la cognossince dal inglês e di chêz altris lenghis, anzit al jude la flessibilitât mental e la predisposizion al plurilinguisim".

